

CANZUNEDDA  
A MARIA SS. ADDULURATA  
A LU CALVARIU DI LI CRUCI  
MURRIALI



## CANZUNEDDA

Cantamu cù giubilu  
Maria di li Cruci  
ludamu a gran vuci  
lu gran nomu sò.

L'immagini bedda  
nun si visitava  
ca' nuddu pinsava  
di viniri ca'.

Sti lochi sempri  
sirvianu a tutt'uri  
a li jucaturi  
pri lu fini sò.

Maria Addulurata  
si' Matri d'amuri  
di li piccaturi  
rifugiu si' Tu.

Sta gioia si granni  
nun cosa prizzata  
e sula lassata  
pri tant'anni fu.

Dicianu bistemmi  
sti gran scilirati  
ed autri piccati  
facianu di chiù.

Sunava la trumba  
a tutti 'nvitava  
viniti a la cava  
la scola c'è cca'.

Li so' fausi massimi  
da' supra dicia  
'nsignava la via  
ca' lu 'nfernù va.

Vulia ca' sintissivu  
lu jugu, lu pisu  
chi supra nn'ha misu  
lu nostru Gesù.

Cca' supra Luciferu  
la scola tinia,  
la strada facia  
di l'iniquità.

Duttrini pirversi  
'nsignava a tutt'uri  
stu fausu dutturi  
ca' uguali nun'ha.

In chistu gran munnu  
dicia di scialari  
e di sicutari  
li so' vanità.

Li gran giuvamenti  
di chistu gran munnu,  
sapiti chi sunnu?  
La malignità.

Cci sù frodi e cabali,  
cci sù frodi e liti  
di lazzi e di vizi  
e dannu di cchiù.

V'alletta e vi pasci,  
cù duci paroli,  
v'allegra lu cori,  
ma nenti cci pò.

Si va comu pisci  
curririti a chist'isca  
allegra vi pisca,  
vi porta cun sé.

E' vana e terrena  
é tutt'apparenti  
e l'alma cuntenti  
mai fari nun pò.

Lu vostru nimicu,  
l'ha già dichiaratu  
e l'ha riprovatu,  
l'amanti Gesù.

E quannu presenta  
li pompi e li sfrazzi  
vi para li lazzi  
sgarrari vi fa.

Vi duna a gustari  
la finta ducizza  
ma è vera amarizza  
la morti avi 'nsè.

Me' figghi dilette,  
a mia sintiti,  
lu munnu fuiti,  
li sò vanità.

E tutta di tenebri,  
di confusioni  
pri l'animi boni  
sta terra nun fà.

Vulati: già l'ali,  
lu spaziu vi detti,  
cù tutti l'affetti  
vulati a Gesù.

Vulati a li chiaghi,  
sù lochi sicuri  
dda nuddu timuri  
e scantu nun cc'è.

E lu vostru cori,  
pirchì è senza feli,  
cci trova lu meli,  
chi saziu lu fa.

O casti palummi,  
via prestu fuiti  
li lazzi e li riti  
parati cci sù.

Ed è un munti altissimu,  
Gesù redenturi,  
e lu cacciaturi  
firiri nu' vi pò.

Trasitini dintra,  
palummi sinceri,  
li nighi e sparveri  
nun magnanu ddà.

E tutti sintianu  
cu summu stupuri  
di chistu dutturi  
sti malignità.

E mentri c'insigna  
sta fausa duttrina  
chi struggi e ruina  
chi dannu nun fa!

Sti cosi arrinnovanu  
gran peni e òuluri  
a lu Redenturi  
a lu Figghiu sò.

E voli un gran tempiu  
cca' supra furmatu  
e voli ludatu  
lo gran nomu sò.

Lu serpi 'nfirnali  
si stizza e s'incagna  
da chista muntagna  
cacciatu nni fu.

Su' spini, su' chiaghi  
sti cosi a lu cori,  
Maria quasi mori  
chi pena nun ha!

Maria di li Cruci  
nun po' suppartari  
già voli cacciari  
chisti iniquità.

Enormi fu prima  
Maria disprizzata  
tutt'uri ludata  
da tutti sempr'è.

Maria di li Cruci  
scacciau la sò testa,  
nun fa scola o festa  
nun triunfa chiù.

Lu nomu santissimu  
sintennu ludari  
si metti a trimari  
chi scampu nun ha!

C'è 'mucca di tutti  
Maria di li Cruci  
si loda a gran vuci  
a disdetta sò.

Si vidi lu beni,  
di notti e di jornu,  
sta cosa di scornu  
a lu 'nfernù fu.

O genti chi fustivu  
cca' supra 'ngannati  
viniti, acchianati,  
la Mastra c'è ccà.

Si muzzica e rudi  
e s'accudduria,  
si vota, sfirria  
e paci nun ha.

E di la matina  
pri finu chi scura  
si loda e s'onura  
in bucca sempr'è.

Curriu lu virsariu  
quantu vitti via  
sintennu Maria  
nun ci torna chiù.

Ccà supra stu munti,  
vi dici Maria:  
sintiti di mia  
la gran virità.

Iu sugnu la sedi  
di la Sapienza  
in mia di scienza  
tisorì cci sù.

Ancora a vui figghi,  
ca sù Matri pia,  
v'insignu la via  
chi dritta a Diu va.

V'ottengu l'aiutu,  
la forza, la lena,  
l'impacci e la pena  
livata sarà.

Ssò jugu è suavi,  
leggeru è ssò pisu,  
chi supra v'ha misu  
Diu, summa buntà.

Vi 'nsgnu e vi spiegù  
la strada divina,  
la vera duttrina  
d'amari a Gesù.

E' stritta e scuscisa,  
si va a passu lentu  
e pochi e stanchi  
camminanu ccà.

E vui comu cervi  
a cui nenti noci,  
spediti e veloci  
curriti a Gesù.

E' jugu di pinni  
chi l'alma sulleva,  
lu pisu cci leva  
vulari la fa.



La spoglia e purifica  
di li mali affetti  
e la suttametti  
a Cristu sò Re.

Cù beddi catini  
la tira e l'alletta  
ed idda cù fretta  
d'appressu ci va.

Lu jugu munnanu  
chist'alma scutiu,  
lu Regnu di Diu  
ha dintra di sè.

Nun cura lu munnu,  
nè linguì mordaci,  
oh! quantu ci piaci  
sirviri a stu Re.

E Iddu cci regula  
li sò sentimenti,  
li moti, la menti,  
la sò volontà.

Su' d'oru 'ntrizzati  
cu' aneddi assai fini,  
su' chisti catini,  
la sua carità.

Cumincia a gustari  
la ducizza eterna,  
la paci superna,  
la tranquillità.

Vi detti l'esempiu,  
stu jugu purtau  
e mancu sciatau  
miu Figghiu Gesù.

Ssì fu nicissaria  
a un Diu Redenturi,  
ah vâ, piccaturi,  
ah vâ, pîrchî no?

Truvati lu latti,  
truvati ddà l'acqua,  
chi tutti vi sciacqua,  
chiù puri vi fa.

Ed Iu fortementi  
di lu miu diletto  
li chiaghi a lu pettu  
vi 'mprimu di chiù.

E tutti li vizii,  
li mali pinseri,  
la carni e li senzi  
crucifigghirà.

L'ha dittu Iddu stissu  
chi 'n celu nun è ammissu  
stu jugu, stu pisu  
chi nun purtirà.

Lu vostru rifugiu,  
sù Cristu faciti,  
sicuri sariti  
e vi stati ddà.

Cu' vivu sigillu  
'ntra ssù pettu stissu  
Gesù Crucifissu  
impressu sarrà.

'Ntra chisti caverni  
chi aviti ridati,  
a Cristu placati  
cù simplicità.

Iu sugnu la Mastra,  
vi 'nsignu a prigari,  
vi 'nsignu a placari  
l'offisa a Gesù.

Ci sona all'oricchia  
stu gridu, sta vuci,  
ed oh! quant'è duci,  
a Cristu Gesù.

Stu chiantu, sta pena,  
sta grann'amarizza  
in grann'alligrizza  
canciata sarà.

E nuddu di l'animi,  
sta grann'alligrizza,  
l'eterna ducizza  
livari cci pò.

Vi fazzu cumpagni  
di lu miu gran chiantu,  
stu chianciri, oh quantu!  
accettu sarà.

'Ntra chisti calvarii,  
vi dicu: chianciti,  
pirchè cumpatiti  
lu vostru gran Re.

A chiddi chi chiancinu  
Gesù fa gudiri  
l'immensi piaciri  
chi 'n celu cci sù.

Chi così ha sarvatu,  
nè lingua pò dirli,  
nè menti capirli,  
bastanti nun cc'è.

Firmamuli un pò russi  
sti gran documenti,  
firmamuli a menti  
sti gran virità.

Sta stidda lucenti,  
lu sò gran spenduri,  
'ntra l'occhi si oscuri  
vidiri nni fa.

Stu tempiu si fabrica  
'ntra vausi e 'ntra rupi,  
in chisti sdirupi,  
lu voli Idda ccà.

Maria di li Cruci,  
la sua gran putenza,  
la sua pruvvidenza,  
vidiri nni fa.

E' mastra divina,  
nni 'nsigna la via  
lasciari a Maria  
sgarru è un pò.

Viremuci spissu,  
ccà l'omini boni  
darà lezioni  
nnà lu tempiu sò.

Cci vonnu gran spisi  
cci vonnu gran stenti,  
e comu cù nenti  
alzari si può?

Fussi oru ed argentu,  
cu setti dinari,  
li fa fabbricari  
lu gran tempiu sò.

Maria vosi scegliri  
un'omu babbanu,  
d'un pedi e 'na manu  
e ciuncu di cchiù.

Cuntannu sta cosa,  
li genti nun 'nganna  
già tutti lu sannu  
minzogna nun è.

Maria di li Cruci  
a vui ricurremu,  
pirdunu vulemu,  
di l'iniquità.

A Vui gran Virgini,  
cu' fidi sincera,  
'na granni prighera  
stu populu fa.

Tra l'acqua e la nivi  
ccà supra acchianava  
la lampa addumava  
cù sincirità.

M'apporta stupuri  
ma fa maravigghia,  
un babbu arrisbigghia  
la nostra città.

Cu' acchianava ccà anmatula,  
chidd'omu chi nun cridi,  
aviticci fidi,  
chi grazii vi fa.

Nun sia lu sò gridu  
inutili e vanu,  
stinniti la manu  
ssù chista città.

A Vui già si fabrica  
stu tempiu cu' soletta,  
ma mentre nn'aspetta  
lu Figghiu di cchiù.

Pri alzari lu tempiu,  
ch'è vivu e perfettu  
'ntra lu nostru pettu  
a Cristu Gesù.

E ddà vostru Figghiu  
putissi abitari  
e dintra rignari  
pirchì é temiu sò.

Faciti pruvari  
a nui piccaturi  
lu vostru duluri  
chi granni sî fu.

Di lu nostru cori  
livati l'asprizza  
e chidda durizza  
chi dintra cci sta.

Faciti c'ornassimu  
stu tempiu di sciuri  
chi dassiru oduri  
di sante virtù.

Faciti chi fussi  
a lu nostru pettu  
un gratu fascettu  
di mirra, Gesù.

Si st'alma ch'è morta,  
sarrà trapassata  
di sta vostra spata,  
la vita avvirrà.

Pri vui, criatura,  
a Diu sempri accetta,  
la Matri diletta  
stu chiantu nun fa.

Vulemu assaggiari  
lu calici amaru,  
nni piaci, n'è caru  
e duci nni fa.

Lu summu Pontifici,  
la Chiesa guardati,  
li lupi cacciati,  
di lu greggi sò.

Putissi purtari  
li sò puvureddi  
e tutti l'agneddi  
in celu a Gesù

Assai sù di chi chianciri  
ragiuni nn'avemu  
chi sempri affinnemu  
lu vostru Gesù.

Pri aviri li forzi  
d'iri a gudiri  
li veri piaciri  
chi 'n celu ci sù.

Pri reggiri e pasciri  
stu populu elettu,  
stu greggi diletto  
di cui capu nn'è.


Guardati propizia  
lu nostru suvrano,  
mittiti la manu  
'ntra lu Regnu sò.

Faciti c'avissi  
li veri ornamenti  
e l'accriscimenti  
di santi virtù.


E' chinu d'imbrogghi  
stu munnu fallaci,  
mittiti la paci  
'ntra chista città.

In chistu sò Regnu  
felici rignassi,  
li mostri scansassi,  
di l'iniquità.

Di lupi rapaci  
nun semu sicuri  
mannati un pasturi  
cà a Vui piacirà.







AVE MARIA  
DELL'ADDOLORATA

Ti saluto, o Maria, Madre  
Addolorata, il Crocifisso è  
con te. Tu piangi per noi,  
figli del tuo dolore,  
mostrandoci il frutto del  
tuo seno, Gesù.

Santa Maria, Madre del Croci-  
fisso, lacrime ti domandiamo  
noi crocifissori del tuo  
Figlio; adesso e nell'ora  
della nostra morte.

Così sia.

(San Bonaventura)